

11.11.2008

Betreff: Gewichte von Lembeh

Sali mitenand

Dos dusse siet gestert in Ströhme rägnet und ich dr ganzi Tag für mi Divemaster glernt ha, nim ich mir jetzt e kleini Ussziet und schrieb über die letschä Ereignis:

- Won ich letschts Weekend mini Tauchsache usspackt ha, damit ich im Pool alles binenand ha, hani dänkt: "wieso isch das BCD (Tauchgilet) so schwer...komisch", i has denn schnäll gmerkt, ich ha doch tatsächlich e Gwicht vo Lembeh (Indonesie) zrug uf Thailand brocht...voll gröhl! Sinn jo numme 800 Gramm.
- Wie dir villicht uf unserer Homepage gseh hänn, hänn mir e paar Föteli vo unserne Hustier druff do, unter anderem e zimlig fetti Spinne. Sie het zwar nur no 7 Bei, aber s Problem isch, as me nie weiss wo sie sich grad versteckt und denn mues i jedesmol e riese Gump in d Luft mache, wenn sie mi aluegt. Ansunschte hänn mir e fridlichi Katz im Hus, e gumpende Minifrosch in dr Kuchi und wunderschöni Vögel in dr Umgäbig. D Grille und die grössre Frösch lönn mi zwar mängisch nid ieschlofe - do muess doch immer an die liebi Helene danke - aber sisch halt eifach unser Thailand.
- S Boot isch nonig ganz fertig und wägem Räge wird's au nid wie plant uff e Mittwoch fertig, dorum isch d Jungfere Fahrt uf e Donnstig verschobe.
- Am Samstag han i nach bestandener Theorie die erschti Session im Pool für mi Rettigswimer kha, wie immer unter nid ganz alltägliche Umständ: zirka 100 Jugendlichi hänn uf de Stäge vom Poolstadion e Art Motivationstrainig mit ihrne Lehrer kha, was heisst dass sie wie die Wilde schreie, klatsche und uff d Trummle umme haue...i ha jo vorhärt scho Kopfweh kha, aber nochärt isch no viel schlimmer gsi.
- Dr Mischa het miessä s Opfer spiele und är he das so überzügend gmacht, dass ihm in dr Panik sini Tauchmaske kaputt gange isch; do sag i numme sälber tschuld!
- Am 12.11. isch jo s Liechterfest in Thailand, dorum hets grad e Art Herbstmäss in Ranong, wie scho bim letschtä Mol kha me ganz viel tolli Spieli mache, neu gits au e Stand wome kha uf Fraue ziele wo in Käfige sitze und wenn me gnuag oft trifft, falle sie unde dra ins Wasser....dr Hammer und das im prüde Ranong!
- Neu gits e Restaurant vomenä Dän gleitet, dört kha me jedä Samstag fein Falang food (Western)ässe und Dütschi Biecher tüschle, mir sinn gsi und hänn unter anderem eine kenne glernt wo uf Kho Phayam e Bar het. Während dr Rägezyt isch är aber in Ranong und won är die Wuche zrug uf d Insle isch, het me ihm scho am Pier verzellt, as är jo jetzt günstig Laptops würd verkaufe in sinerä Bar....tja, never trust the family. Währenddäm är in Ranong gsi isch, het dr Brueder vo sinerä Frau kurzerhand sies Lokal „ghietet" und us allem Gäld gmacht wo nid agnaglet gsi isch, unter anderem ebbe au sie Laptop. Är het en den aber dörfe zrug kaufe :-)
- Mir hänn zwar zwei Hüser agluegt, aber mir könne jetzt doch im Hus vom Stuart und dr Ying bliebe..isch e langi, relativ uninteressanti Story, also erspar ich euch dä Part. Fact isch, as uns dr Stuart fascht wahnsinnig macht. Är will jo im Januar unter Wasser hürote..au das e langi Gschicht...aber wenn är so wieter macht, lauft ihm d Ying vorhärt drfoh! Eins isch sicher, dä Typ het ADHS (Aufmerksamkeitsdeffizitsyndrom)!!!!

Unsernä Mäge gohts prächtig, dr rituelli Wooggang macht uns au Freud (vor allem em Mischa sine Pirelli) und ansunschte freue mir uns ufs Tauche.

Wenns morn nid allzu fescht rägnet, gönnt mr uf em Boot go hälfe alles putze und ierichte und ich due no chli lernä.

Mir wünsche euch e ganz e schöne Zistig und freue uns uf euri Mails und Kommentär.

Carmen und Mischa